

欒城集

冊四



欒城集卷第十

詩九十六首

和孔武仲金陵九詠

白鷺亭

白鷺洲前水奔騰亂馬牛亭高疑欲動船去似無憂
洶湧山方壞澄清練不收中秋誰在此明月滿城頭

覽輝亭

城裏最高處坡陀見一城山多來有緒江遠靜無聲
歌吹風前度樓臺雨後明風光同楚蜀聊此慰平生

鳳凰臺

鳳鳥久不至斯臺空復高何年種梧竹特地翦蓬蒿
白水來無際青山轉幾遭南遊且未返江海共滔滔

天慶觀

興廢不可必冷城今靜祠松聲聞道路竹色淨軒墀
江近風雲改亭深草木滋孤墳弔遺直狂闇閔元規

卞臺墓
在觀側

高齋

金陵佳處自無窮使宅幽深卽故宮樓殿六朝遺燼
後江山百里舊城中雨餘尚有金鈿落月出長窺粉
堞空看盡一城懷古地茲遊恨不與君同

此君亭

在華藏寺

綠竹不可數孤亭一倍幽色分巖石潤梢出澗松修
雪節寒方見春萌旱不抽故山多此物長恨未歸休

見江亭

在蔣山

江水信浩渺連山巧蔽虧端能上嶮絕故自識津涯
滅沒檣竿度飄搖鷺羽遲何人倚舟望亦愛此峯危

定林院

定林兩山間崖木生欲合茅屋倚巖隈重重陰清樾
晨齋取旁寺生事信幽絕吾人定何爲常欲依暖熱

八功德泉

君言山上泉定有何功德熱盡自清涼苦除卽甘滑
頗遭遊人病時取破匏挹煩惱雖云清凜然終在臆

遊鍾山

江南四月如三伏北望鍾山萬松碧杖藜試上寶公
龕衆壑秋聲起相襲青峯回抱石城小白練前橫大
江直石梯南下俯城闔松徑東蟠轉山谷喬林無風
聲如雨時見遊僧石上息行窮碧澗一庵巖坐弄清
泉八功德歸尋晚飯衆山底困臥定林依石壁朝遊
不知澗谷遠莫歸但覺穿雙屐老僧一身泉上住十

年掃盡人間迹客到唯燒柏子香晨飢坐待山前粥
丈夫濟時誠妄語白首居山本良策茹蔬飯糗何足
道純灰洗心聊自滌失身處世足愆尤愧爾山僧少
憂責

郭祥正國博醉吟庵

姑熟溪頭醉吟客歸作茅庵劣容席團團鵝卵中自
明窗前月出夜更清醉吟自作溪上語不學擁鼻維
陽生詩成付與坐中讀知有清溪可終日作詩飲酒
聊復同誰來共枕溪中石圓天方地千萬里中與此
間大相似囂然一息不自停水火雷風相滅起直須
只作此庵看歌罷曲肱還醉眠不用騎鯨學太白東
入滄海觀桑田

湖陰曲

老虎穴中臥獵夫不敢窺驊騮服箱驂盜驪巡城三
匝漫不知帳中晝夢日遶壁驚起知是黃須兒馬鞭
七寶留道左猛士徘徊不能過遺矢如冰去已遙明
日神兵下赤霄荒城至今人不住狐兔驚走風蕭蕭
舟次大雲倉回寄孔武仲

一風失前期十日不相見君帆一何駛去若乘風箭
我舟一何遲出沒蔽葭亂甕中有白糟床上有黃卷
妻孥不足共思子但長嘆池陽重相遇撫手成一粲
先行復草草回首空眷眷人生類如此遲速亦何算
一見誠偶然四海良獨遠相期廬山陰把臂上雲巘

池州蕭丞相樓二首

遶郭青峯睥睨屯入城流水縠文翻樓成始覺江山
勝人去方知德業尊坐久浮雲羸後嶺酒醒飛雪變

前村我來邂逅公歸國猶喜登臨共一樽

池守滕元發時將解

去

丞相風流直至今朱欄仍對舊山林奔馳軒冕身何
有跌宕圖書意最深松遶城頭風瑟縮江浮山外氣
陰森三年不起南遷想應有前人識此心

過九華山

南遷私自喜看盡江南山孤舟少僮僕此志還復難
局促守破窻聯翩過重巒忽驚九華峯高拱立我前
蕭然九仙人縹緲凌虛煙碧霞爲裳衣首冠青琅玕
揮手謝世人可望不可攀我行竟草草安能拍其肩
但聞有高士臥聽松風眠松根得茯苓狀若干歲龜
煮食一朝盡終身棄腥羶腹背生綠毛輕舉如翔鸞
相逢欲借問已在長松端何年脫罪罟出處良自便

芒鞋挂藤杖逢山卽盤桓斯人未可求巖室儻復存
佛池口遇風雨

長江五月多風暴欲行先看風日好此風忽作東南
來陰雲如湧撥不開驚雷往還轉車轂狂波低昂起
坑谷中流一葉那復持卷舒已付天公知解帆轉柁
不容語佛池中幸可住須臾急雨變昏霾柁師喜
賀風已回澄谿不動縈白練老木蒼崖蔚葱蒨繫舟
茅屋得青蔬試問釣船還有魚開樽引滿向妻子明
日復行未須怖陰陽開闔良等閑扁舟誰令乘嶮艱
舟次磁湖以風浪留二日不得進子瞻以詩
見寄作二篇答之前篇自賦後篇次韻

慙愧江淮南北風扁舟千里得相從黃州不到六十
里白浪俄生百萬重自笑一生渾類此可憐萬事不

由儂夜深魂夢先飛去風雨對床聞曉鍾

西歸猶未有菟裘擬就南遷買一邱舟楫自能通蜀
道林泉真欲老黃州魚多釣戶應容貰酒熟鄰翁便
可留從此莫言身外事功名畢竟不如休

黃州陪子瞻遊武昌西山

千里到齊安三夜語不足勸我勿重陳起遊西山麓
西山隔江水輕舟亂鳥驚連峯多回溪盛夏富草木
杖策看萬松流汗升九曲蒼茫大江湧浩蕩衆山蹙
上方寄雲端中寺倚巖腹清泉類牛乳煩熱須一掬
縣令知客來行庖映脩竹黃鵝時新煮白酒亦近熟
山行得一飽看盡千山綠幽懷苦不遂滯念每煩促
歸舟浪花暝落日金盤浴妻孥寄九江此會難再卜
君看孫討虜百戰不搖目猶憐江上臺高會飲千斛

巾冠墮臺下坐使張公哭異時君再來攜被山中宿

將還江州子瞻相送至劉郎泐王生家飲別

相從恨不多送我三十里車湖風雨交

晉車武子故居其水曰車

湖

松竹相披靡繫舟枯木根會面兩王子嘉眉雖異

郡雞犬固猶邇相逢勿空過一醉不須起風濤未可

涉隔竹見奔駛渡江買羔豚收網得魴鯉朝畦甘瓠

熟冬盎香醪美烏菱不論價白藕如泥耳誰言百口

活仰給一湖水奪官正無賴生事應且爾卜居請連

屋扣戶容屣履人生定何爲食足真已矣愆尤未見

雪世俗多相鄙買田信良計蔬食期沒齒手持一竿

竹分子長湖尾

赤壁懷古

新破荊州得水軍鼓行夏口氣如雲千艘已共長江

險百勝安知赤壁焚觜距方強要一鬪君臣已定勢
三分古來伐國須觀釁意突成功所未聞

自黃州還江州

身浮一葉返溢城凌犯風濤日夜行把酒獨斟從睡
重還家漸近覺身輕岸回樊口依稀見日出廬山紫
翠橫家在庾公樓下泊舟人遙指岸如頰

江州城下土赤如赭

江州五詠

射蛟浦

萬騎巡遊遍千帆破浪輕射蛟江水赤教戰越人驚
山轉樓船影岸催連弩聲祈招無為賦酣寢盡平生

浦上積水相傳漢武教樓船於此

浪井

江波浮陣雲岸壁立青鐵胡為井中泉湧浪時驚發

水性本無定得止自澄澈誰爲女媧手補此天地裂

庾樓

元規情不薄上客有殷生夜半酒將罷公來坐不驚
舞翻江月迴談落塵毛輕塵世風流盡高樓空此名

東湖

讀書廬山中作郡廬山下平湖浸山腳雲峯對虛榭
紅蕖紛欲落白鳥時來下猶思隱居勝亂石驚湍瀉

李勃隱居廬山泉石奇勝今樓賢寺其故居也及爲九江太守始營東湖風物可愛

琵琶亭

湓江暮雨晴孤舟暝將發夜聞胡琴語展轉不成別
草堂寄東林雅意存北闕潸然涕泗下安用無生說

不到東西二林

山北東西寺高人永遠師來遊亦前定回首獨移時

社散白蓮盡山空玄鶴悲何年陶靖節溪上送行遲

遊廬山山陽七詠

開先瀑布

山上流泉自作溪行逢石缺瀉虹霓定知雲外波瀾闊飛到峯前本末齊入海明河驚照曜倚天長劍失提攜誰來臥枕莓苔石一洗塵心萬斛泥

漱玉亭

山回不見落銀潢餘溜喧厖響石塘目亂珠璣濺空谷足寒雷電繞飛梁入瓶銅鼎春茶白接竹齋廚午飯香從此出山都不棄滿田秔稻插新秧

簡寂觀

山行但覺鳥聲殊漸近神仙簡寂居門外長溪淨客足山腰苦筍助盤蔬喬松定有藏丹處大石仍存拜

斗餘弟子蒼髯年八十養生世世授遺書

歸宗寺

來聽歸宗早晚鐘疲勞懶上紫霄峯墨池漫疊溪中
石白塔微分嶺上松佛宇爭推一山甲僧廚坐待十
方供欲遊山北東西寺巖谷相連更幾重此寺王逸
少所置云
有墨池
在焉

萬杉寺

萬本青杉一手栽滿堂白佛九天來仁宗初年有僧
手種萬杉特為
建此寺仍以
禁中佛賜之涓涓石溜供廚足轟轟山屏遶寺開半
榻松陰秋簟冷一杯香飯午鐘催安眠飽食平生事
不待山僧喚始迴

三峽石橋

三峽波濤飽沂沿過橋雷電記當年江聲髣髴瞿唐

口石角參差灩澦前應有夜猿啼古木已將秋葉作
歸船老僧未省遊巴蜀松下相逢問信然

白鶴觀

五老相攜欲上天玄猿白鶴盡疑仙浮雲有意藏山
頂流水無聲入稻田古木微風時起籟諸峯落日盡
生煙歸鞍草草還城市慙愧幽人正醉眠

南康阻風遊東寺

欲涉彭蠡湖南風未相許扁舟厭搖蕩古寺慰行旅
重湖面南軒驚浪卷前浦霏微雪陣散顛倒玉山舞
一風輒九日未悉土囊怒百里斷行舟仰看飛鴻度
故人念征役一飯語平素竹色淨飛濤松聲亂秋雨
我生足憂患十載不安處南北已兼忘遲速何須數

寄題陳憲郎中竹軒

家有脩篁綠滿軒趨庭詩禮舊忘言凌霜自得良朋
友過雨時添好子孫試翦輕筠扶野步旋收涼葉煮
清樽風流共道勝桑梓鄰里何妨種百根

次韻孔武仲到官後見寄

舉楫同千里繫舟時一言共嗟蓬作屋願就席爲門
行役身先困征商思益昏僅同登壘斷何止服車轅

次韻筠守毛維瞻司封觀修城三首

北垣荆棘舊成堆留待公來次第開車馬已通城下
路榛蕪盡付冶家灰異時碧瓦千門合應記紅旌百
度來自笑裨謔便曠野肩輿飛蓋許追陪

撥棄案頭文字堆曉晴山色四門開究懷民事老雖
壯俛首山城心已灰荆棘燒殘桑柘出狐狸去盡犬
雞來規模先遣通蹊隧後乘應容衆客陪

山脚侵城起阜堆，遶城徼道斬新開。
闐闐半壞驚潮信，隍壑初深見劫灰。
蟻聚千夫曾幾日，鱗差萬瓦看將來。
史君才力輕山郡，朝論行聞急召陪。

次子瞻夜字韻作中秋對月二篇一以贈王

郎一以寄子瞻

平明坐曹黃昏歸，終歲得閑惟有夜。
已邀明月出牆東，更遣清風掃庭下。
城上青鬢四山合，門前白練長江瀉。
誰家高會吹參差，鄰婦悲歌春罷亞。
二年憂患今已過，一夜清光天所借。
西京詩句出蘇李，南國風流數王謝。
已隨孤棹去中原，肯顧新科求上舍。
讀書本自比嵇鍛，學劍要須問曹蔗。
清觴灑灑君莫違，佳句駸駸予已怕。
狂夫猖狂終累人，不返行遭親黨罵。

又

十年秋月照相思相從祇有彭門夜露侵笳鼓思城
闕寒迫魚龍舞潭下厭厭夜飲歡自足落落襟懷向
人瀉秋深河來巨野溢水乾樓起滕王亞北海孔公
雖好客河內寇君那得借是非朝野忽紛紜得喪芳
菲一開謝明月多情還入門流水何知空遶舍晨餐
江市富鱸魴夜宿山村足梨蔗坐隅鵬鳥不須問牆
外蝮蛇猶足怕婁公見唾行自乾馮老尙多誰定罵

次韻王適食茅栗

相從萬里試南餐對案長思苜蓿盤山栗滿籃兼白
黑村醪入口半甜酸久聞牛尾何曾識竊比雞頭意
未安故國霜蓬如盃大夜來彈劍似馮驩

過毛國鎮夜飲

風格照人華省郎江山遶郭古仙鄉漫傳鉛鼎八百

歲未比金釵十二行不動歌聲人已醉旋聞詩句夜
初長簿書撥盡知餘力道院清虛頃未嘗

次韻毛國鎮趙景仁唱和三首一贈毛一贈

趙一自詠

治劇從容緩策銜鈴軒無事日清談隼旗畫戟明千
里紙帳繩床自一庵金奏屢陳容客和玉山不動看
賓酣我來邂逅逢寬政忘卻漂流身在南

一紙新詩過鴈銜醒然何異接君談奉親魚蟹兼臨
海退食琴書定有庵一別經年真似夢多憂不飲亦
如酣共君友契非今日蔽芾棠陰自劍南

遠謫江湖舳尾銜到來辛苦向誰談畏人野鶴長依
嶺厭事山僧祇住庵黃雀頓來成一飽白醪新熟喜
初酣疎頑近日尤堪笑坐任飄風去自南

再和三首

穴鼠何須窶藪銜麤官不用苦高談夜傾綠蟻風吹
竹晝擁黃紬雪覆庵每作微詞還自笑偶慚餘潤亦
成酣公詩精絕非倫擬自古騷人盡在南

燕巢泥土一春銜慙愧封侯止立談舊隱尙聞存竹
徑歸休但要葺茅庵釣船夢想沿溪泛酒盞遙思向
日酣強欲遲留依幕府吳公行恐召河南
天教窮困欲誰銜生事那須一一談自笑豐年塵滿
甑不堪雨後菌生庵士師憔悴經三黜陶令幽憂付
一酣宅日歸耕若相憶尺書頻寄北山南

次韻王適州學新修水閣

黃鐘巨挺兩春容何幸幽居近學宮坐對江山增浩
氣力追齊魯欲同風頌詩聞道求何武家法行看試

左雄欲伴少年遊，翼相奔軍慙愧恐詞窮。

次韻毛君九日

山腳侵城盡是臺，登高處處喜崔嵬。手拈霜菊香無
奈，面拂江風酒自開。幕府樽壘雲裏集，民家歌吹靜
中來。定知勝卻陶彭澤，悵望籬邊白日頹。

次韻毛君感事書懷

種棠經歲便成科，秋雨調勻氣漸和。才力有餘嫌事
少，風情無限覺詩多。長松更老仍添節，古井雖深自
不波。宴坐山房人豈識，一樽聊且慰蹉跎。

次韻毛君見督和詩

新詩落紙一城傳，顧我疎蕪豈足編。宅日杜陵詩集
裏，韋迢略見兩三篇。

次韻毛君山房遣興

欲就陽崖暖新開石磴斜誰言太守宅自是野人家
燕坐收心鑑冥觀閱界沙退公長寂寞外物自喧譁
缺逕移松補斜陽種竹遮白雲生後礎孤鷺伴殘霞
破悶時尋鶴呼眠亦任鴉喜聞糟出甕屢問菊開花
古井元依斗丹砂舊養芽蚍蜉頻上案猿狖巧分樵
客到扁舟遠年侵兩鬢華心搖掛風旆眼暗隔輕紗
強撥橫肱睡來從插版衙隱居慙棄擲勝地每咨嗟
頑鈍終何取彫磨豈復加焦先夙所尙園舍恰如蝸

和胡教授蒙太守策試諸生

著籍初同闕里多采芹先致魯風和欲將大策觀胸
膽盡召中堂列鴈鵝終日正言何忌諱幾人餘力尙
委蛇豈惟太守知爲政仍見先生善設科

和毛君州宅八詠

鳳凰山

山川蟠踞偶成形威鳳低回久未行更種梧桐真可
致高飛性似伯夷清

披仙亭

仙翁舊住蜀江邊千歲歸來一鶴翩城郭已非人事
改淒涼遺迹但披仙

方沼亭

池上茅簷覆水低早來秋雨尙虹霓敗荷折葦飛鴻
下正憶漁舟泊故溪

翠樾亭

一夜飛霜點綠苔曉庭黃葉掃成堆簷間翠樾彫疎
盡却放牆東好月來

李八百洞

洞府山川百里賒洞門藤蔓鎖煙霞神仙不與人間
異弟妹還應共一家

煉丹井

鑿井燒丹八百年塵緣消盡果初圓石床蘚鬢人安
在綠水團團一片天

磨劍池

神仙鑄劍本無刃岸石斑斑尚鐵銑天上少年仍狡
獪不須還爾對方平

山房

岸幘攜筇夜夜來蒲團紙帳竹香臺直須覓取僧爲
伴更爲開庵斲草萊

次韻毛君病中菊未開

病肺秋深霧雨傷舊繒故絮喜清涼菊花金粟未曾

吐桂酒鵝兒空自黃草木亦知年有閏風霜漸近月

方陽

十月爲陽月

得詩聞道維摩病欲到毗耶言已忘

雨中宿酒務

微官終日守糟缸風雨淒涼夜渡江早歲謬知儒術
貴安眠近喜壯心降夜深唧唧醅鳴甕睡起蕭蕭葉
打窗阮籍作官都爲酒不須分別恨南邦

次韻毛君經旬不用鞭扑

共喜秋深酒未醇官曹休假不須旬政寬境內棠陰
合訟去庭中草色新不惜牛刀時一割已因鼯鼠發
千鈞歲終誰爲公書考豈止江西第一人

次韻李撫辰屯田修州門

六月江濤壁壘頽蒼崖翠壁就新臺咄嗟雙闕還依
舊咫尺羣山信有材畫戟風生兩衙退飛橋日出萬

人來不因毀圮催興築誰見雍容治劇才

飲酒過量肺疾復作

朝蒙麴塵居夜傍糟床臥鼻香黍麥熟眼亂瓶罌過
囊中衣已空口角涎虛墮啜嘗未云足盜醕恐深坐
使君信寬仁高會慰寒餓西樓適新成明月猶半破
擁簷青山橫拂檻流水播雕盤貯霜實銀盞薦秋糯
共言文字歡豈待紅裙佐惟知醜醜滑不悟頗羅大
夜歸肺增漲晨起脾失磨情懷忽牢落藥餌費調和
衰年足奇窮一醉仍坎坷清樽自不惡多病欲何奈
聞公話少年舉白不論箇歌吟雜嘲謔笑語爭掀簸
平明起相視銳氣曾未挫達人遺形骸駑馬懷豆莖
不知逃世網但解憂歲課不見獨醒人終費招魂些

衢州趙閱道少師濯纓亭

掛冠纓上已無塵猶愛溪光碧照人點檢舊遊黃石
在掃除諸念白鷗親一樽父老囊金盡三逕松筠生
事貧它日南公數人物丹青添入縣圖新

茶花二首

黃蘗春芽大麥麤傾山倒谷採無餘久疑殘枿陽和
盡尙有幽花霰雪初耿耿清香崖菊淡依依秀色嶺
梅如經冬結子猶堪種一畝荒園試爲鉏
細嚼花鬚味亦長新芽一粟葉間藏稍經臘雪侵肌
瘦旋得春雷發地狂開落空山誰比數烝烹來歲最
先嘗枝枯葉硬天真在踏遍牛羊未改香

次韻毛君山房卽事十首

案牘希疎意自開夜闌幽夢曉方回青苔紅葉騷人
事時見詩筒去又來

東晉仙人借舊山定應天意許公閑郡人欲問史君
處笑指峯巒紫翠間

蛩知秋候時鳴壁香礙蒲簾不出門隱几無言心有
得南窗晴日暖侵軒

溪山付與醉中仙美酒何曾斗十千就得江邊賤魚
稻閑官未用苦相憐

忘身先要解忘名分別須臾起不平請看早朝霜入
屨何如臥聽打衙聲

禽哢秋來不復圓桐陰霜後亦成穿黃花強欲招酣
飲白髮偏工報老年

邂逅清歡屢不期病來無奈羽觴飛醉乘籃輦江邊
去長伴漁舟月下歸

醉裏題詩偏韻惡秋來勸酒益盃深不才多病俱非

敵綠綺緣何得報金

庵中獨宿雨垂垂永夜無人款竹扉
灰冷銅爐香欲滅床頭一點醵燈微
觸事隨緣不用多華堂玉食奈憂何
美人未厭山阿陋薜荔爲裳帶女蘿

再和十首

澗草巖花日日開江南秋盡似春回
旋開還落無人顧惟有山蜂暖尙來
江上孤城面面山居人也自不曾閑
蜂遊蟻聚知何事日夜長橋南北間
城郭村墟共水雲
籬竹屋映柴門
隱居亦有高人在岸幘無言倚釣軒

一官疎散自疑仙三考應成醉日千
早病固須閑地

著多憂長被達人憐

養生尤復要功圓溜滴南溪石自穿近見牢山陳道

士微言約我更三年

牢山陳道士瑛近過此叩之竟無所云約三年當再見

張公詩社見公名

公昔與張伯達為唱和之友

白首山城嘆不平

坐客要聞新樂府應須溢口琵琶聲

高情日與故山期鴻鵠誰言也倦飛且聽漁人強哺

啜坐中羈客畏公歸

天為多才故欲禁府門摧落漲江深鼎新翠壁排精

鐵湧出飛樓直百金

樓上青山遶四垂畫橋百步引朱扉落成當與公同

上一看長江白練微

歌舞留賓意自多華燈數問夜如何白頭病客無才

思慣臥茅庵長薛蘿

筠州二詠

牛尾狸

首如狸尾如牛攀條捷嶮如猿猴橘柚爲漿栗爲餵
筋肉不足惟膏油深居簡出善自謀尋蹤發窟并執
囚蓄租分散身爲羞松薪瓦甑烝浮浮壓入糟盜肥
欲流熊肪羊酪真比儔引筋將舉訊何尤無功竊食
人所仇

黃雀

秋風下黃雀飛禾田熟黃雀肥羣飛蔽空日色薄
逡巡百頃禾爲稀翾翻巧捷多且微精丸妙繳舉輒違
乘時席勢不可揮一朝風雨寒霏霏肉多翅重天時
非農夫舉網驚合圍懸頸系足膚無衣百箇同缶仍
相依頭顱萬里行不歸北方居人厭羔豨咀噍聊發

一笑欵

樂城集卷第十

樂城集卷第十一

詩八十六首

和毛君新葺困庵船齋

厭居華屋住東庵真味全勝食齋甘多病維摩長隱
几無心彌勒便同龕誤遊田舍空成笑謬入僧房卽
欲參風霽不知吹有萬月明聊共影成三齋如小舫
才容住室類空困定不貪擁褐放衙人寂寂脫巾漉
酒鬢鬢畫囊書帙堆窻案藥裹瓢樽掛壁籃簷竹
風霜曾不到盆花蜂蝶未全諳公餘野鵲驚初睡賓
醉佳人笑劇談勸客巨觥那得避和詩難韻不容探
曉來霏霧連江氣冬後溫風帶嶺嵐去國屢成還蜀
夢忘憂惟有對公酣終身狗祿知何益投檄歸耕貧
未堪借我此庵泥藥竈古書鴻寶試淮南

寒雨

江南殊氣候冬雨作春寒冰雪期方遠蕉絺意始闌
未妨溪草綠先恐嶺梅殘忽發中原念貂裘據錦鞍

積雨二首

山雨無時歇江波上岸流泥深未免出橋斷更堪憂
房淺鄰糟甕宵寒攬絮裘朝來勢未已歸路恐操舟

又

微陽力尚淺未解破重陰雲氣山川滿江流日夜深
凍牙生滯穗餘潤及重衾泥濘沉車轂農輸絕苦心

戲贈李朝散

江霧霏霏作雪天樽前醉倒不知寒後堂桃李春猶
晚試覓酥花子細看

戲荅

銀餅瀉酒正霜天玉塵生風夜更寒下客不辭投轄
飲好花猶恐隔簾看

臨江蕭氏家寶堂

高人不解作生涯唯有中堂書五車竹簡多於孔氏
壁牙籤新似鄴侯家田園豈是子孫計青紫今爲里
巷誇富貴早知皆有命君應未厭十年賒

和蕭刑察推賀族叔司理登科還鄉四首

家聲籍籍大江西南臨老揮毫捧御題得意何殊少年
樂還家不惜醉如泥

讀盡家藏萬卷書蕭然華髮宦遊初區區獄掾何須

愧聊把春秋試緒餘

漢儒以春秋決獄

作官未減讀書勤簿領從今日日新汗簡章編誰付
予傳家應有下帷人

巷南諸子足才賢邂逅相逢秀句傳強作短章同寄
與異時見我一依然

次韻吳厚秀才見贈三首

騷人思苦骨巖巖百里攜詩相就談故作微詞挑遷
客不嫌春雨濕歸衫少年舊喜登高賦老病今成見
敵慙問我近來誰復可對君聊擬誦周南
久欲歸田計未成羨君負郭足爲生躬耕不用千鍾
祿高臥誰知萬里征已覺安閑真樂事可憐辛苦盡
浮名隱居便作江南計爲覓佳山早寄聲

一卷新詩錦一端掉頭吟諷識芳酸哀歌永夜悲牛
角朗詠扁舟笑杏壇間發笙簧猶可擬棄捐斤斧定
知難繼君高韻君應笑咀嚼歸途久據鞍

次韻毛君燒松花六絕

茅庵紙帳學僧眠
爐爇松花取易然
惟有未能忘酒
在手傾金盞鬪垂連

餅雜松黃二月天
盤敲松子早霜寒
山家一物都無

棄狼籍乾花最後般

蜀人以松黃
爲餅甚美

松老香多氣自嚴
餘煙勃鬱透疎簾
須臾過盡惟灰

在借問誰收一番炎

美人寒甚懶開扉
金作松花插翠羅
幾度低頭疑墮
落青煙已斷未消時

枯萼鱗皴不復堅
重重正似半開蓮
曾經樵舍墼爐
見未許邦君畫閣然

黃蠟供炊自一家
錙銖貧富遞矜誇
都城爭買方薪
貴却顧松花已自奢

陪毛君遊黃仙觀

李叟仙居仍近市黃公道院亦依城定應昔日山林
地未有今時雞犬聲白鶴翻飛終不返黃冠憔悴只
躬耕試從車騎尋遺跡恐有居人解養生

次韻王適梅花

江梅似欲競新年照水窺林態愈妍霜重清香渾欲
滴月明素質自生煙未成細實酸猶薄半落南枝意
可憐誰寫江西風物樣徐家舊有數枝傳

次韻王適春雪二首

江南春候寒猶劇細雨風吹作雪花中夜窻扉初晷
漾平明草木半低斜潤催江柳排金綠光雜山茶點
絳葩老病不堪乘曉出紛紛能使髮增華

春雪飄搖旋不成依稀履跡散空庭山藏複閣猶殘
白日照南峯已半青

毛君惠温柑荔支二絕

楚山黃橘彈丸小未識洞庭三寸柑不有風流吳越
客誰令千里送江南

荔子生紅無奈遠陳家曬白到猶難雖無驛騎紅塵
起尙得佳人一笑歡

次韻王適遊真如寺

江上春雨過城中春草深擾擾市井塵悠悠溪谷心
東郊大愚山自古簷蔔林微言久不聞墜緒誰當尋
道俗數百人請聞海潮音齋罷車馬散万籟俱消沉
新亭面南山積霧開重陰蕭然偶有得懷抱方悒悒
我坐米鹽間日被塵垢侵不知山中趣强作山中吟

次韻王適新鷺

好雨纖纖潤客衣新來雙鷺力猶微似嫌春早無人

見故待簾開掠地飛南國花期知不遠中原寒劇未
應歸養雛不怕巢成早記取朝朝爲啓扉

官居卽事

官局紛紜簿領迷生緣瑣細老農齊偷安旋種十年
木肉食還須五母雞對酒不嘗憐酤權釣魚無術漫
臨溪此身已分長貧賤執爨縫裳愧老妻

陪毛君夜遊北園

池塘草生春尙淺桃李飛花初片片一樽花下夜忘
歸燈火尋春畏春晚春風暗度人不知滿園紅白已
離披江南春雨少晴日露坐青天能幾時折花只恐
傷花意攜客就花花定喜落蘂飄香翠袖中交柯接
葉燈光裏雨練風柔雪不如精神炫轉影扶疎夜香
飛鷺勝朝日月暗還須明月珠美人勸我殊非惡明

日雨來無此樂醉歸不用怕山公馬上接羅先倒著
山橙花口號

故鄉寒食茶蘼發百和香濃村巷深漂泊江南春欲
盡山橙髣髴慰人心

次韻馮弋同年

細雨濛濛江霧昏坐曹聊且免泥奔賣鹽酤酒知同
病一笑何勞賦北門

送王適徐州赴舉

送別江南春雨淫北方誰是子知音性如白玉燒猶
冷文似朱弦叩愈深萬里同舟寬老病一杯分袂發
悲吟明年榜上看名姓楊柳春風正似今

遊吳氏園

細雨作寒晴便暖好風吹袂意初佳清池解洗春心

熱紅豔能添醉眼花紫竹暗生岷岫笋山舟強比洛
人家憐渠巧與閑官便申退來遊未覺賒

江州周寺丞夷詠亭

行過廬山不得上溢江城邊一惆悵羨君山下有夷
亭千巖萬壑長相向山中李生好讀書出山作郡山
前居手開平湖浸山脚未肯卽與廬山疎道州一去
應嫌遠千里思山夢中見青山長見恐君嫌要須罷
郡歸來看

次韻毛君遊陳氏園

增築園亭草木新損花風雨怨頻頻簞簞似欲迎初
暑芍藥猶堪送晚春薄莫出城仍有伴攜壺藉草更
無巡歸軒有喜知誰見道上從橫滿醉人

江漲

山中三日雨江水一丈高崩騰沒洲渚淫溢侵蓬蒿
凌晨我有適出門舟自操中塵已易肆下道先容舸
雞犬萃墳冢牛羊逾圈牢廚薪散流枿困米爲浮糟
臥席不遑卷剝蠶仍未縲老弱但坐視閭里將安逃
徙居共擾擾來勢方滔滔嗟余偶同病哀爾爲生勞
晴日慰人願寒風送驚濤藩籬出舊趾羸蚌遺平臯
流竄非擇地艱難理宜遭胡爲苦戚戚一夕生二毛

和子瞻鐵拄杖

截竹爲杖瘦且輕石堅竹破誤汝行削木爲杖輕且
好道遠木折恐不到閩君鐵杖七尺長色如黑虵氣
如霜提攜但恐汝無力撞堅過險安能傷柳公雖老
尙強健閉門却掃不復將知公足力無嶮阻憐公未
有登山侶回生四海惟一身袖中長劍爲兩人洞庭

漫天不覺過半酣起舞驚鬼神願公此杖亦如此適
意遨遊日千里歸來倚壁示時人海外蒼茫空自記

競渡

史君欲聽榜人謳一夜江波拍岸流父老不知招屈
恨少年爭作弄潮游長鯨破浪聊堪比小旆迎風殊
未收角勝爭先非老事凭欄寓目思悠悠

登郡譙偶見姜應明司馬醉歸

蒼然暮色映樓臺江市遊人夜未迴何處酒仙無一
事肩輿鼾睡過橋來

送姜司馬

七歲立談明主前江湖晚節弄漁船鬪雞誰識城東
老喪馬方知塞上賢生計未成歸去詠草書時發醉
中顛當年不解看齊物氣踴如山誰見憐

寄題趙岬承事戲綵堂

春晚安輿遍浙東永嘉別乘喜無窮橐裝已笑分諸
子吏道何勞問薛公堂上壽樽諸掾集室中禪論衲
僧通興闌却返林泉去幕府長留孝弟風

次韻溫守李鈞見寄兼簡毛大夫

梁苑相從簿領中清風相逐畫船東婆娑江海凌雲
鶴飲啄籠樊失渚鴻別後丹砂迷舊訣愁來白髮變
衰翁此間詩老仍勅敵正憶高吟酒盞空

次韻洞山克文長老

無地容錐卓年來轉覺貧偶知珠在手一任甑生塵
竄逐非關性顛狂却甚真此心誰復識試語洞山人
試院唱酬十一首

戲呈試官呂防

新秋風月正涼
天空館相看學坐禪
滿榻詩書愁病
眼隔牆砧杵思高
眠霜飛一葉凋瓊玉
風遶雙松奏
管絃聞道熊羆歸
夢數侵天闈棘漫
森然

次韻呂君豐城寶氣亭

紫氣飛空不自謀
誰憐黽勉匣中留
西山猛獸橫行
甚北海長鯨何日收
星斗不堪供醉舞
蛟龍會看反
重湫功成變化無
蹤迹望斷中原百尺樓

次韻呂君見贈

偶然傾蓋接清言
不覺門前晝漏傳
老病低摧方伏
櫪壯心堅銳正當年
莫嫌客舍一杯酒
試論灑山三
祖禪
明日程文堆几案
只應衰懶得安眠

呂前官舒州問禪灑

次韻呂君興善寺靜軒

自恨尋山計苦遲年過四十始知非小軒迎客如招
隱野鳥窺人自識機窗外竹深孤鶴下堦前菊秀晚
蜂飛老僧戰勝長幽寂瘦骨緣何未肯肥

觀試進士呈試官

松庭散朝日棘戶啓秋風鵠鷺紛來下旌旗儼未攻
馳詞看倚馬餘力送征鴻逸足誰先到孤標想暗空
晶熒雙鏡並高下片言公老病方耽睡飛沉一夢中

次前韻

南國號多士幾人洙泗風英材自入彀壞陣不勞攻
文縟山藏豹飛高弋慕鴻蚩妍歸品藻得失付虛空
考行先推本登賢旋奏公期君緩歸轡一醉鹿鳴中

戲呈試官

只隔牆東便是家悁悁還似在天涯客心不耐聽松

兩歸信猶堪飲菊花翦燭看書良寂寞披沙見玉忽
喧譁自慚空館難留客試問姮娥稍駐車

次前韻三首

老去在家同出家楞伽四卷卽生涯龔詩怪我心猶
壯細字憐君眼未花霜落初驚衾簟冷酒酣猶喜笑
言譁歸心知有三秋恨莫學忽忽下坂車

門前溪水似漁家流浪江湖歸未涯邂逅高人來說
法支離枯木旋開花諸生試罷書如積劇縣歸時訟
正譁安得騎鯨從李白試看牛女轉雲車

濁醪能使客忘家屈指歸期已有涯魚化昨宵驚細
雨鹿鳴它日飲寒花已諳江上看蔬薄莫笑衙前鼓
笛譁太守况兼鄉曲舊會須投轄止行車

試罷後偶作

重門閉不開烏鳥相呼樂晨暉轉簾影微風響松末
喧譁適已定寂歷方有覺人生竟何事外物巧相縛
當時不自悟已過空成作耕耘亦何苦遊宦殊自惡
棄彼既已誤就此良應錯誰能卽兩忘隨緣更無作
放榜後次韻毛守見招

飽食安眠愧不材疎簾翠帟幸相陪深居正厭銀袍
亂失喜初聞鐵鎖開佳句徑蒙探古錦小槽仍報滴
新醅諸人欲見風流伯不用招呼亦自來

送毛滂齋郎

先志承顏善養親束裝騎馬試爲臣酒腸天與渾無
敵詩律家傳便出人擁鼻高吟方自得折腰奔走漸
勞神歸來一笑須勤取花發陳吳二月春

燕貢士

泮水生芹藻干旄在浚城桑鴉同變響莘鹿共和鳴
秋晚槐先墮霜多桂向榮清樽助勸駕急管發驩聲
勇銳青衿士淹通白髮生芬芳雜蘭菊變化等鷗鯨
去日衣冠盛歸時里巷驚坐中詞賦客愧爾一經明

次韻毛君清居探菊

眼前黃葉畏秋霜耳畔啼蛩怨夜長佳節欣聞近萸
菊清商試爲奏伊涼疎狂久笑謀生拙貧病應憐爲
口忙今日共公拚一醉從教人道亦高陽

次韻毛君見贈

江國騷人不耐秋夜吟清句曉相投鋒藏豈願囊中
脫尾斷終非俎上羞擇地何年真得意鋪糟是處可
同遊南遷尙有公知我人事何須更預謀

次韻毛君偶成

年來衰病正相兼，薄宦奔馳尚未厭。
詩句空多渾漫興，俗緣已重不須添。
聲牙向物知難合，疎懶憐公獨未嫌。
時聽淵明詠歸去，猶應爲我故遲淹。

孔平仲著作江州官舍小庵

近山不作看山計，引水新成照水庵。
閉口忘言中自飽，安心度日更誰參。
簡編圍遶穿書蠹，窻戶低回作蠶蠶。
我亦一軒容膝住，敝裘麤飯有餘甘。

送饒州周沃秀才免解

少年工作賦中歲，復窮經驥老終。
知道劍埋新發硎，束裝鄰里助答策。
友朋聽還似臨淄，貢隨風起北溟。
雪中洞山黃檗二禪師相訪

江南氣暖冬未回，北風吹雪真快哉。
雪中訪我二大士，試問此雪從何來。
君不見六月赤日起冰雹，又不

見臘月幽谷寒花開紛然變化一彈指不妨明鏡無
纖埃

毛國鎮生日二絕

生日元同小趙公里閭相接往還通恠公日夜歸心

切欲寄此生丹竈中

世謂叔平大趙參政閱道小趙參政趙公善養生故有丹灶之

句

聞公歸橐尙空虛近送楞嚴十卷書心地本無生滅
處定逢生日亦如如

次韻毛君將歸

疎傳思歸不待時孟軻出晝苦行遲新詩尙許留章
句故事誰從問典彝金馬尙應堪避世石泉未信可
忘飢不才似我真當去零落衡茅隔雍岐

送楊騰山人

胸中萬卷書不如一囊錢不見楊夫子歲晚走道邊
夜歸空床臥兩手摩涌泉窻前雪花落真火中自然
渙然發微潤飛上崑崙顛霏霏雨甘露稍稍流丹田
閉目內自視色如黃金妍至陽不獨凝當與純陰堅
一窮百不遂此事終無緣君看抱朴子共推古神仙
無錢買丹砂遺恨盈塵編歸去守茅屋道成要有年

次韻子瞻與安節夜坐三首

前山積雪暮崢嶸燕坐微聞落瓦聲共對一樽通夜
語相看萬里故鄉情信歸嶺上寒梅遠恨極江南春
草生明日青銅添白髮且須醉睡倒燈檠
少年高論苦崢嶸老學寒蟬不復聲目斷家山空記
路手披禪冊漸忘情功名久已知前錯婚嫁猶須畢
此生家世讀書難便廢漫留案上鐵燈檠

謫官似我無歸計落第憐渠有屈聲握手天涯同一
笑倚門歲晚不勝情黃岡俯仰成陳迹白首蹉跎畏
後生歸去且安南巷樂莫看歌舞醉長檠

次韻毛君上書求歸未報

白髮憂民帶減圍頻聞慷慨賦將歸近傳道士連三
嚙久悟禪門第一機夜永庵中詩自得日高門外客
來稀此心素定誰能勸祇有丁寧詔莫違

次韻毛君絕句

中池有士閉重關夜發天光走玉環白日對人人不
識幅巾破褐任塵漫

次韻毛君留別

問天乞得不訾身屈指人間今幾人魚縱江潭真窟
宅鶴飛松嶺倍精神清風吹雨停歸騎舊圃留花送

晚春自號白雲知有意便從丹竈拂埃塵

送毛君致仕還鄉

古人避世事豈問家有無但言鴻鵠性不受樊籠拘
公家昔盛時阡陌連三衢倉廩濟寒餓婚嫁營羈孤
千金赴高義脫手曾須臾晚爲二千石得不償所逋
撫掌不復言但以文字娛我恨見公遲冉冉垂霜鬚
高吟看落筆劇飲驚倒壺負罪不自知適意忘憂虞
忽聞叩天闈言旋故山廬朋友不及謀親戚亦驚呼
人生各有意何暇問俗徒嗟我好奇節嘆公真丈夫
天高片帆遠目斷清風徂惟應東宮保迎笑相攜扶

贈景福順長老二首

并敘

轍幼侍先君聞嘗遊廬山過圓通見訥禪師留連
久之元豐五年以譴居高安景福順公不遠百里

惠然來訪自言昔從訥於圓通逮與先君遊歲月
遷謝今三十六年矣二公皆吾里人訥之化去已
十一年而順公年七十四神完氣定聰明了達對
之悵然懷想疇昔作二篇贈之

屈指江西老多言劍外人身心已無著鄉黨漫相親
竄逐知何取周旋意甚真仍將大雷雨一洗百生塵

又

念昔先君子南遊四十年相看順老在想見訥師賢
歲歷風輪轉禪心海月圓常情計延促無語對潛然
次韻孔平仲著作見寄四首

昔在京城南成均對茅屋清晨屣履過不顧車擊轂
時有江南生能使多士服同儕畏鋒銳兄弟更馳逐
文成劇翻水賦罷有餘燭連收領底髭未耗髀中肉

飛騰困中路，黽勉啄場粟。歸來九江上，家有十畝竹。
一官粗包裹，萬卷中自足。還如白司馬，日聽杜鵑哭。
我來萬里外，命與江波觸。罪重慙故人，囊空仰微祿。
已爲達士笑，尙謂愚者福。米鹽日草草，奔走長碌碌。
尺書慰貧病，佳句爛珪玉。多難畏人知，胡爲強題目。
徂年慕桑梓，歸念寄鴻鵠。但願洗餘愆，躬耕江一曲。

又

共居天地中大類，一間屋推排出高下。何異車轉轂，
死生本晝夜。禍福固倚伏，誰令塵垢昏。浪與紛華逐，
譬如薪中火。外照不自燭，感君探至道。勸我減梁肉，
虛心有遺味。實腹不須粟，芬敷謝桃李。清勁比松竹，
息微知氣定。睡少驗神足，胡爲嗜一飽。坐使百神哭，
要知丹砂異。不受腥腐觸，可憐山林姿。自縛斗升祿。

君看出世士肯屑世間福寧從市井游與衆同碌碌
不願束冠裳腰金佩鳴玉斯人今何在未易識凡目
恐在廬山中飛翔逐黃鵠試用物色尋應歌紫芝曲

又

百病侵形骸漸老同破屋中有一寸空能用輻與轂
忽如丹砂走不受凡火伏前瞻意不遠後躡愈難逐
將炊甑中飯未悟窻下燭聰明役聲形口腹嗜魚肉
塵泥翳泉井荆棘敗禾粟未知按妙指漫欲理絲竹
廬山多名縉過客禮白足達觀等存亡世俗強歌哭
確然金石心不畏蚊蚋觸順忍爲裳衣供施謝榮祿
真人我自有渡海笑徐福衆皆指庸庸自顧非碌碌
愧君詩意厚桃李報瓊玉舉網羅衆禽有獲非一目
喧啾定無用要自取黃鵠君看大方家慎勿留一曲

又

治生非所長兒女驚滿屋作官又迂疎不望載朱轂
因緣罣罪罟未許卽潛伏空餘讀書病日與古人逐
老妻憐眼昏入夜屏燈燭上官念貧窶時節饋醪肉
衰年類蒲柳世事劇麻粟數日望歸田寄語先栽竹
文章亦細事勤苦定何足君詩四相攻欲看守陴哭
愧無卽墨巧不解火牛觸自非太學生彫琢事干祿
安心已近道閉口豈非福胡爲調狂詞玉石相落碌
腹中抱丹砂舌下漱白玉作詩雖云好未免亂心目
弈秋教二人不取志鴻鵠摩詰非不言遺韻寄終曲
陰晴不定簡唐覲祕校并教吳二君五首

積雨春連夏新晴忽復陰江痕漲猶在梅氣潤相侵
蕉紵還須脫圖書漸不禁江南舊風俗愁絕北來心

又

蠶眠初上簇麥熟正磨鎌雲氣重重合江流夜夜添
荐飢人甚困多病我仍兼欲就橋南宿單衣莫雨霑

又

漲江方斷渡小棹信輕生貧賤誰憐汝漂浮空自驚
一官終竊食何計早歸耕忽發騷人恨淒涼久未平

又

西隣豫章客病骨瘦欒欒清夜眠孤枕終朝飽一簞
雨多愁不出講罷未應餐約我晴相過門前泥欲乾

又

二子薪中楚相攜泮上游齏鹽聊度日爰象久忘憂
寂寞君何病驅馳我自羞何時采芹處永日看鳧鷗

欒城集卷第十一

樂城集卷第十二

詩八十九首

雨後遊大愚

風光四月尚春餘
淫雨初乾積潦除
古寺蕭條仍負郭
閑官疎散亦肩輿
摘茶戶外蒸黃葉
掘笋林中間
綠蔬一飽人生真
易足試營茅屋傍僧居

送高安羅令審禮

一邑憂勞水旱中
牛刀閑暇似無功
政成仍喜新蠶熟
歸去還將舊橐空
清白久聞誇父老
沉埋誰爲愬諸公
謫居長恨交游少
悵望肩輿又欲東

送唐覲

溪上幽居少四隣
西家幸有著書人
經年食菜誰憐瘦
終日題詩自不貧
身在江湖釣竿地
心馳蘭會戰

車塵此行便有飛騰處笑殺年來老病身

唐君常欲為陝西官

慨然有功名之志

次韻唐覲送姜應明謁新昌杜簿

夫子雖窮氣浩然輕箠短笠傲江天薄遊到處唯耽

酒歸去無心苦問田泮上講官殊不俗山中老簿亦

疑仙相從未足還辭去欲向曹溪更問禪

姜如晦方作嶺外之行

新種芭蕉

芭蕉移種未多時濯濯芳莖已數圍畢竟空心何所

有欹傾大葉不勝肥蕭騷暮雨鳴山樂狼籍秋霜脫

敝衣堂上幽人觀幻久逢人指示此身非

次韻姜應明黃蘗山中見寄

垂老閑居味更深此身隨世任浮沉北窗未厭曲肱

臥西洛能傳擁鼻吟
疋馬徬徨猶寄食
敝裘安樂信無心
我今漂泊還相似
同愧高僧支道林

次韻黃大臨秀才見寄

故人聚散霜前葉
往事眇茫風際煙
遊宦一生非有已
隱居萬事不由天
崎嶇檻穽方謀食
嘯傲山林肯計年
賴已將心問盧老
相逢它日笑風顛

次韻李朝散遊洞山二首

古寺依山占幾峯
精廬髣髴類天宮
三年欲到官爲礙
百里相望意自通
無事佛僧何處著
入羣鳥獸不妨同
眼前簿領何時脫
一笑相看丈室中

又

僧老經時不出山
法堂延客未曾關
心開寶月嬋娟處
身寄浮雲出沒間
休夏巾幘誰與共
迎秋水石不

勝閑近來寄我金剛頌欲指胸中無所還

簡學中諸生

泮水秋生藻荇涼莫窗燈火亂螢光圖書粗足惟須
讀菽粟才供且自強羽籥暗催新節物弦歌不廢近
詩章腐儒最喜南遷後仍見西雛白鷺行

以蜜酒送柳真公

床頭釀酒一年餘氣味全非卓氏壚送與幽人試嘗
看不應知是百花鬚

次韻柳見答

桂酒無人寄豫章

江西官釀惟豫章最佳

羈愁牢落遣誰當烹

煎崖蜜真牽強慙愧山蜂久蓄藏江上鱸鱸橙正熟
山頭吹帽菊初香漂流異日俱陳迹笑說過從想未

志

披仙亭晚飲

落日欲沒多雲煙南山暝鴉歸北山樓臺城上半明
滅燈火橋頭初往還江西八月熱猶在坐中遷客頭
欲班何時解網聽歸去黃花白酒疎籬間

余居高安三年每晨入莫出輒過聖壽訪聰
長老謁方子明浴頭笑語移刻而歸歲月既
久作一詩記之

朝來賣酒江南市日莫歸爲江北人禪老未嫌參請
數漁舟空怪往來頻每慙菜飯分齋鉢時乞香泉洗
病身世味漸消婚嫁了幅巾緇褐許相親

次韻子瞻感舊見寄

少年耽世味徘徊不能去老來悟前非尙愧昔遊處
君才最高峙鶴行鷄羣中我雖非君對顧以兄弟同

結髮皆讀書明月入我牖縱橫萬餘卷臨紙但揮手
學成竟無用掩卷空自疑卻尋故山友重赴幽居期
秋風送餘熱冉冉如人老衣裘當及時田廬亦須早
種竹竹生筍種稻稻亦成浩歌歸來曲曲終有遺聲

次韻和人豐歲

風雨迎寒欲勞農今年真不負元豐蓋藏共荷官無
擾眠食安知帝有功草笠黃冠將蜡祀羔羊朋酒亦
豳風請君早具躋堂飲退食委虵正自公

同孔常父作張夫人詩

女子勿言弱男兒何必強君看張夫人身舉十五喪
頭上脫笄珥篋中斥襦裳築墳連丘山松柏鬱蒼蒼
親戚不爲助涕泣感道傍昔有王氏老身爲尚書郎
親死棄不葬簪裾日翱翔白骨委廬陵宦遊在岐陽

一旦有丈夫軒軒類佯狂相面識心腹開口言災祥
嗟汝平生事不了令誰當汝身暖絲綿汝口甘稻粱
衣食未嘗廢此事乃可忘一言中肝心投身拜其牀
傍人漫不知相視空茫茫終言汝不悛物理久必償
兒女病手足相隨就淪亡鄙夫本愚悍過耳風吹牆
明年及前期長子憂盱瘍一麾守巴峽雙樞還故鄉
弱息雖僅存蹒跚亦非良誰言天地寬網目固自張
古事遠不信近事世所詳企張非求福禍敗當懲王

嘉祐末年李士寧言王君事於右扶風其報甚速張
夫人南都人孔推官常甫作詩言其賢邀余同作并
言李生事或足以警世云

次煙字韻答黃庭堅

病臥江干鬚帶雪老捻書卷眼生煙貧如陶令仍耽
酒窮似湘纍不問天令弟近應憐廢學大兄昔許叩

延年比聞蔬茹隨僧供相見能容醉後顛

魯直兄舊於齊州以

養生見教

東軒長老二絕 并敘

始余於官舍營東軒彭城曹君煥子文自浮光訪
余於高安道過黃岡家兄子瞻以詩送之曰君到
高安幾日迴一時抖擻舊塵埃贈君一籠牢收取
盛取東軒長老來君過廬山見圓通知慎禪師出
詩示之師嘗與余通書見之欣然明日謂君昨見
黃州詩通夕不寐以一偈繼之曰東軒長老未相
逢卻見黃州一信通何用揚眉資目擊須知千里
事同風吾野人不能數爲書君爲我誦之而已君
旣至未暇及此客有自廬山至者曰慎師送客出
門還入丈室燕坐而寂君乃具道其事余感之作

二絕其一以答子瞻其二以答慎也

東軒正似虛空樣何處人家籠解盛縱使盛來無著

處雪堂自有老師兄

子瞻新築東坡雪堂

檐頭挑得黃州籠行過圓通一笑開卻到山前人已

寂亦無一物可擔迴

題方子明道人東窗

紙窗雲葉淨香篆細煙青客到催茶磨泉聲響石餅
禪關敲每應丹訣問無經贈我刀圭藥年來髮變星

次前韻

閉門何所事毛髮日青青齒折登山屐塵生貰酒餅
調心開貝葉救病讀難經定起無人見寒燈一點星

迎寄王適

投竄千山恨不深扁舟夏涉氣如烝重來疋馬君何

事歸去飛鴻我未能養氣經年惟脫粟讀書終夜有
寒燈安心且作衰慵伴海底鯤魚會化鵬

王度支陶挽詞二首

風蹟殊不昧聲名豈偶然長途催駮驥爽氣激鷹鷂
薏苡成遺恨松楸卜遠年淒涼故吏盡誰泣鬣封前
又

京塵昔傾蓋江國見佳城零落舊冠劍艱難孝弟兄
存亡看世俗意氣憶平生曉鐸知人恨幽音亦未平
次韻陳師仲主簿見寄

朽株難刻畫枯葉任凋零舊友頻相問村醪獨未醒
山牙收細茗江實得流萍頗似申屠子都忘足被刑
寄題江渙長官南園茅齋

白髮辛勤困小邦塵勞坐使壯心降河陽罷後成南

圃彭澤歸來臥北窗
畦畔草生親荷鍤
床頭酒熟自傾缸
因君遣我添歸興
舊有茅茨濯錦江

詠霜二首

江南雪不到霜露滿山村
紙被欺氈厚茅簷笑瓦溫
何曾凝沼淥有意隔朝暎
底日身無事高眠不出門

又

清霜欺客病乘夜逼窗扉
坐睡依爐暖細聲聞葉飛
蕉絺空滿篋砧杵旋催衣
起看庭前草松筠未覺非

次韻吳厚秀才見寄

壯心摧折漸無餘
早歲爲文老不如
登木求魚知我拙
循窠覓兔笑君疎
清樽獨酌夜方半
白髮潛生歲欲除
久恐交親還往絕
床頭猶喜數行書

乾荔支

含露迎風惜不嘗故將赤日損容光紅消白瘦香猶
在想見當年十八娘

次韻王適元日并示曹煥二首

井底屠酥浸舊方床頭冬釀壓瓊漿舊來喜與門前
客終日同爲酒後狂老大心情今已盡塵埃鬢髮亦
無光江南留滯歸何日萬里逢春思故鄉

又

放逐三年未遣回復驚爆竹起春雷祈年粗有樽中
桂寄遠仍持嶺上梅莫笑牛狸抵羊酪漫將崖蜜代
官醅二君未肯嫌貧病猶得衰顏一笑開

寄梅仙觀楊智遠道士

道師近在真人峯欲往見之路無從去年許我入城
市塵埃暗天待不至莫往莫來勞我心道書寄我千

黃金蠶衣肉食思慮短文字滿前看不見口傳指授
要有時脫去羅網當見之梅翁漢朝南昌尉手摩龍
鱗言世事一朝拂衣去不還身騎白麟翳紅鸞我今
雖復墮塵土道師何不與我語它年策足投名山相
逢拍手一破顏

春雪

溫風吹破臘留雪惱新春信逐殘梅到花從半夜勻
旋消微覆瓦狂下亦欺人壓竹時聞落埋萱久未伸
山川濛不解樓觀洗成新擁褐僧方睡開門客屢嘖
爨煙知歲稔履迹笑吾貧畦凍初生韭泥融正賣薪
寒魚爭就汕濁酒頗無巡預喜田宜麥粲飡餅餌頻

贈石臺問長老二絕

并敘

石臺長老問公本成都吳氏子棄俗出家手書法

華經字細如黑蟻前後若一將誦之萬遍雖老而
精進不倦脇不至席者二十有三年余來高安以
鄉人相好蓋余懶而好睡見之惕然自警因贈之
二小詩云

法達曾經見老盧半生勤苦一朝虛心通口誦方無

礙笑把吳鸞細字書蜀中藏經往有古仙人吳采鸞細書經卷精妙可愛

蒲團布衲一繩床心地虛明睡自亡長伴空中月天

子東方行道到西方

和毛國鎮白雲莊五詠

掬泉軒

卜築高深已有山起居清潤可無泉穿牆白練秋聲
細照屋清銅曉色鮮已放魚鰕嫌跳擲更除蘋藻任
漪漣只應明月中宵下長共禪心相向圓

平溪堂

清溪似與隱君謀，故入堂前漫不收。
盥手從今休汲井，浮觴取意便臨流。
花漂澗谷來應遠，石激琴箏久未休。
莫把朱欄強圍遶，山家事事要清幽。

眺遠臺

山似高人長遠人，不登高處見無因。
築臺土石無多子，照眼峯巒得許新。
陣馬奔騰時絕遠，風濤舒卷忽無垠。
白雲自是逃名處，猶恐此中藏隱淪。

濯纓庵

臨池濯足惜泉清，纓上無塵且強名。
橫木爲橋便獨往，結茅依島類天成。
往還漸少人誰識，寢食無爲身轉輕。
有似三吳朱處士，釣魚誰與話西征。

白雲莊偶題

歸去攜家住白雲雲中猿鶴許同羣陶公酒後詩偏
好疎傅金餘客屢醺芒屨潛行逐漁釣壺漿時出勞
耕耘卻看人世應微笑未熟黃梁晝夢紛

次韻王適落日江上二首

寒煙冪清江漁唱扁舟上江轉少人家自此知安往
維舟倚叢薄明月獨相向欲曉醉應醒還逐輕鷗颺

又

稍息南市喧初上東山月潛魚忽驚踴飢鴈時斷絕
落葉誤投籤繁霜疑積雪苦寒良難久愛此元氣潔

張秀才見寫陋容

潦倒形骸山上樗每經風雨輒凋疎勞君爲寫支離
狀異日長看老病初落筆縱橫中自喜賦形深穩妙
無餘偶然掛壁低頭笑俱幻何妨彼亦如

同王適曹煥遊清居院步還所居

身爲江城吏心似野田叟尋僧忽忘歸飽食莫攜手
畏人久成性路遶古城後茅茨遠相望鷄犬亦時有
人還市井罷日落狐兔走迴風吹橫煙燒火卷林藪
草深徑漸惡荆棘時掛肘褰裳涉沮洳斜絕汗池口
投荒分岑寂敬側吾自取二君獨何爲經歲坐相守
遊從乏車騎飲食厭菘韭周旋未忍棄辛苦亦何負
歸來倚南窗試挹樽中酒笑問黃泥行此味還同否

子瞻謫居齊安自臨臯亭遊東坡路過黃泥
坂作黃泥坂詞二君皆新自齊安來故云

次韻王適春雨

久遭客禁往還稀風雨蕭條只自知春色有情猶入
眼客愁無賴巧侵眉山僧寄語收茶日野老留人供
社時久住不須嫌寂寞此間偏與拙相宜

和子瞻蜜酒歌

蜂王舉家千萬口黃蠟爲糧蜜爲酒口銜澗水拾花
鬚沮洳滿房何不有山中醉飽誰得知割脾分蜜曾
無遺調和知與酒同法試投麴蘖真相宜城中禁酒
如禁盜三百青銅愁杜老先生年來無俸錢一斗徑
須囊一倒鋪糟不聽漁父言煉蜜深愧仙人傳掉頭
不問辟穀藥忍飢不如長醉眠

次韻講律李司理憲見贈

強將羔鴈聘黃晞破褐疎巾倚夕暉禮律縱橫開卷
盡虀鹽冷落待賢非日高几案弦歌罷夜永窗扉燈
火微猶喜江邊莫春近舞雩風雨得同歸

次韻王適遊陳氏園

宿雨晴來春已晚衆花飄盡野猶香舞雩便可同沂

上飲襖何妨似洛陽新圃近聞穿沼闊漲江初喜放
舟長年來簿領縈人甚何計相隨入醉鄉

答孔平仲二偈

熟睡將經作枕頭君家事業太悠悠要須睡著元非
睡未可昏昏便爾休
龜毛兔角號空虛既被無收豈是無自有真無遍諸
有燈光何礙也嫌渠

次韻柳真公閑居春日

春寒漸欲減衣綿雨勢冥冥水拍天一局無言消日
永新詩得意許人傳惜花田地應慵掃護筍藩籬可
細編好事報君知我喜同官欲到得閑眠

次韻王適東軒卽事三首

新竹依墻未出尋墻東桃李卻成林池塘草長初饒

夢村落鸞啼恰稱心江滿船頭朝欲轉泥融屐齒莫
尤深閉門憐子成書癖試買村醪相伴斟

眼看東隣五畝花茅簷竹戶野人家過墻每欲隨飛
蝶歸舍誰憐已莫鴉幽客偶來成晚飯野僧何日寄
新茶三年氣味長如此歸計遲遲也自嘉

北園春草徑微微未用頻教翦棘茨蜂陣紛紛初養
蜜鸞巢淺淺欲生兒客情流水兼山遠歸夢遊絲向
日遲懶病相將渾欲慣賴君索我強裁詩

送李憲司理還新喻

采芹芹已老浴沂沂尚寒蒯緱長嘆息首藉正闌干
黃卷忘憂易青衫行路難歸耕未有計且復調閑官

問黃蘗長老疾

四大俱非五蘊空身心河岳盡消鎔病根何處容他

住日夜還將藥石攻

復次煙字韻答黃大臨庭堅見寄二首

水竹遮藏自一川日高茅屋始炊煙犬牙舂米新秋
後麥粒烝茶欲社天冠蓋只今成棄物杉松宅日記
栽年定應笑我勞生在卯睡聞呼衣爲顛

十載懷思寤寐間新詩態度北雲煙清風吹我無干
里明月隨人共一天歸去林泉應避暑北征道路恐
經年與君共愧知時鶴養子先依黑柏顛

次韻子瞻臨臯新葺南堂五絕

江聲六月撼長堤雪嶺千重過屋西一葉軒昂方斷
渡南堂蕭散夢寒溪

旅食三年已是家堂成非陋亦非華何方道士知人
意授與爐中一粒砂

北牖清風正滿床東坡野菜漫充腸華池自有醍醐
味丈室仍聞簷蔔香

隣人漸熟容賒酒故客親留爲種蔬住穩不論歸有
日船通何患出無車

客去知公醉欲眠酒醒寒月墮江煙床頭復有三升
蜜貧困相資恐是天

次韻王適大水

高安昔到歲方閏大水初去城如墟危譙墮地瓦破
裂長橋斷纜船逃逋漂浮隙穴亂羣蟻奔走沙礫摧
嘉蔬里閭破散兵火後飲食敝陋魚鰕餘投荒豈復
有便地遇災祗復傷羸軀人言西有蛟蜃穴閏年每
與風雷俱漫溝溢壑恣游蕩傾崖拔木曾須與雞豚
浪走不復保老稚裸泣空長吁滯留再與茲水會淪

胥未哂斯民，愚人生所遇。偶然耳得失，何用分鎔銖。

贈三局能師二絕

得失從來似偶然，因師聊復問行年。此生竟墮陰陽

數，方信修行力未全。

旅食江干秋復春，歸耕未遂不勝貧。憑師細考何年

月，可買山田養病身。

臨川陳憲大夫挽詞二首

一時冠蓋盛臨川，直亮推公益友先。淡泊朱絲初少

味，蕭疎翠竹久彌鮮。崎嶇處世曾何病，奔走成功亦

偶然。天理更疎終不失，雍雍今見子孫賢。

五月扁舟憶過門，哀憐逐客為招魂。開樽不惜清泉

潔，揮汗相看白雨翻。病起清言驚苦瘦，歸休尺牘尚

相存。秋風灑涕松楸外，談笑猶疑對竹軒。公家有竹軒轍嘗賦

次韻知郡賈蕃大夫思歸

江城漂泊最多時邂逅誰令長者期得坎浮槎應有命投林驚鵲且安枝何年笑語還留客終日勤勞數問兒鈴閣清虛非此比秋風歸興恐非宜

久不作詩呈王適

憐君多病仍經暑笑我微官長坐曹落日東軒談不足秋風北棹意空勞懶將詞賦占鴉臆頻夢江湖把蟹螯筆硯生塵空度日他年何用繼離騷

喜王鞏承事北歸

同罪南遷驚最遠乘流北下喜先歸謂言一笑秋風後卻顧千山驛路非嶺外雲煙隨夢遠江邊魚蟹爲人肥還家嫁女都無事臥讀詩書晝掩扉

予初到筠卽於酒務庭中種竹四叢杉二本
及今三年二物皆茂秋八月洗竹培杉偶賦
短篇呈同官

種竹成叢杉出簷三年慰我病厭厭翦除亂葉風初
好封植孤根筍自添高節不知塵土辱堅姿試待雪
霜霑屬君留取障斜日仍記當年此滯淹

和王鞏見寄三首

南還春及秋江湖未云半逮此歸路長始悟行日遠
幽憂脫沉痼清夢驚婉婉行行逢故人笑語雜悲泣

又

江秋北風多歸帆未應駛天寒鴈南向家書空滿紙
契闊幸安平婚嫁須纓珥交遊何爲者空復念君至

又

折葉每安心連環非所計感君扁舟返念我一塵廢
懷思樂全老疇昔忘言契丹砂儻已成白首願終惠

復次韻

滕王閣在誰攜手徐孺湖寬可放情楚客解書南國

恨秦箏助發上林鸞繫匏獨負杯中物擁鼻知逢洛

下生問得長鬚添夢想蓬窗燈火達天明近遣僕至鍾陵還言

定國與黃君魯直會於舟中燈火終夜而去

孔毅父封君挽詞二首

交契良人厚家風季婦賢詩書中有助蘋藻歲無愆

象服期它日恩封屬此年神傷自不覺弔客問潛然

又

別日笑言重歸來藥餌憂鍾歌掩不試貝葉亂誰收

恨極囊封在情多壠木稠埋文應自作一一記徽猷

上高息軒起亭二絕

山下清谿谿上市谿光山色映人煙幽亭正在人聲裏長與谿山共寂然

溪父起收罾下鯉山翁起賣焙中茶長官亦與人俱起笑擁黃紬放早衙

九月十一日書事

東墻瘦菊早開花九日金鈿已自嘉黍麥候遲初響
甕米鹽法細未還家潑醅昨夜驚泉涌洗盞今晨聽
婦誇歸採茱萸重一醉不須怪問日時差

和王適寒夜讀書

久從市井役百事廢不理感君讀書篇惜此寒夜晷
殷勤附燈燭黽勉就圖史逡巡揖虞夏汗漫馳劉李
斯文家舊物早歲夙從事一從慕羶腥中棄如敝屣

今夕亦何夕忽如舊遊至終篇再三歎推枕不成寐
人生無百年所欲知有幾懸知未必得奔走若趨市
微言寄翰墨開卷入心耳胡爲棄不收所逐在難覲

和王適新葺小室

向日堂東一室存竹爲窗壁席爲門心如白月光長
照氣結丹砂體自溫飯軟莫嫌紅米賤酒香故取潑
醅渾宅年一笑同誰說伴我三年江上村

病中賈大夫相訪因遊中宮僧舍二首

江城寒氣入肌膚得告歸來強自扶五馬獨能尋杜
老一床深愧致文殊體虛正覺身如幻談劇能令病
自無明日出門還擾擾年來真畏酒家壚

東隣脩竹野僧家亂柳枯桑一徑斜逐客慣曾迂短
策使君何事駐高牙蕭條已似連村塢邂逅應容設

晚茶慙愧病夫無氣力隔墻空聽吏兵譁

和王適炙背讀書

少年讀書處寒夜冷無火老來百事慵炙背但空坐
眼昏愁細書把卷惟恐臥寒衣補故褐家釀熟新糯
微微窗影斜曖曖雲陰過昏然偶成寐鼻息已無奈
兒童更笑呼書冊正前墮衰懶今自由不復問冬課

同王適賦雪

北風吹雨雨不斷遍滿虛空作飛霰紙窗獨臥不成
眠茅屋無聲時一沓烏烏錯莫寒未起庭戶空明夜
驚旦重樓複閣爛生光絕澗連山漫不見夾砌雙杉
洗更碧滿田碧草埋應爛城中閉戶無履迹市上孤
烟數晨爨細排玉著短垂簷暗結輕冰時入研撥灰
有客顧樽俎迹免何人試鷹犬未容行役掃車轂應

有老農歌麥飯一來江城若俄頃四見百花飛面旋
坐看酒甕誰敢嘗歸踏冰泥屢成濺年來橋板斷不
屬莫出肩輿足憂患到家昏黑空自笑嫗婦勤勞每
長歎牀頭有酒未用沽囊裏無錢不勞算更令雪片
大如手終勝溪瘴長熏眼謁告猶能不出門典衣共
子成高讌

欒城集卷第十二

兒童更笑平書冊五兩墮長辭今自由不更問冬
野信夢隨書引弟新秋短寒衣前好歸家難憐海
少手驚香氣寒交令殊火次來日事獻文省回空坐
味王面又肯歸書

樂城集卷第十三

詩八十六首

除夜

老去不自覺歲除空一驚深知無得喪久已罷經營
黃卷譏前失清樽借後生何年遂疎懶伏臘任躬耕

種蘭

蘭生幽谷無人識客種東軒遺我香知有清芬能解
穢更憐細葉巧凌霜根便密石秋芳早叢倚脩筠午
蔭涼欲遣靡蕪共堂下眼前長見楚詞章

上元夜

新春收積雨明月澹微雲照水疎燈出因風遠樂聞
天涯仍有節人事竟何分賣酒真拘束何時一醉醺
次韻王適上元夜二首

燈光欲凝不驚風月色初晴若發蒙羈客不眠詩未
就遊人半醉夜方中荒城熠燿相明滅野水芙蓉亂
白紅知欲訪僧同寂寂應憐病懶畏熅熅

宿雨初乾試火城端居無計伴遊行厭看門外繁星
動想見僧窻一點明老罷逢春無樂事夢回孤枕有
鄉情重因佳句思樊口一紙家書百鎰輕

王子立與遲等遊陳家園橋敗幾不成行晚
自酒務往見之明日雨作偶爾成詠

桃李城東近不遙偶聞花發喜相邀斷橋似欲妨佳
思好雨猶能借此朝隨分開樽依綠草偶然信馬及
餘瓢重來莫道無閑暇紫燕黃鸝日漸嬌

幽蘭花二絕

李徑桃蹊次第開穠香百和襲人來春風欲擅秋風

巧催出幽蘭繼落梅

珍重幽蘭開一枝清香耿耿聽猶疑定應欲較香高
下故取羣芳競發時

胡長史祠堂

白首青衫仍隱居晚拋環堵就安輿生芻忽改蒸嘗
地函丈空悲講解餘弟子璵璠相照耀兒孫松桂共
扶疎我來恨不瞻遺老空怪鄉鄰盡讀書

孫賓叟道人

萬里飄然不繫舟酒壚一笑便相投千金不換金丹
訣何事惟須一布裘

新橋

六月長橋斷不收朱欄初喜映春流虹腰宛轉三百
尺鯨背參差十五舟入市樵蘇看絡繹歸家鹽酪免

遲留病夫最與民同喜
卯酉忽忽無復憂

曾子宣郡太挽詞二首

族大徽音遠年高福祚多
生兒盡龍虎封國裂山河
象服驚初揜埋文信不磨
送車江郭滿咽絕聽哀歌

又

安輿逼西北丹旄歷江湖
存沒終無憾哀榮兩得俱
新封崇馬鬣餘福薦浮圖
家法蘋蘩在空堂始一虞

曾子固舍人挽詞

少年漂泊馬光祿末路騫騰朱會稽
儒術遠追齊稷下文詞近比漢京西
平生碑版無容繼此日銘詩誰爲題
試數廬陵門下士十年零落曉星低

次韻王適一百五日太平寺看花二絕

遍入僧房花照眼細尋芳徑蝶隨行
歸時不怕江波

晚新有橋虹水上橫

小檻明窻曾不住閑花芳草遣誰栽但須匹馬尋幽
勝攜取清樽到處開

又次韻遊小雲居

溪上浮花片片輕泝流登岸得山行僧房幽絕雲居
小春日陰晴野色明永遠林棲真有道溺沮耕養亦
忘情此身此意何年遂空使常談笑老生

次韻秦觀梅花

病夫毛骨日凋槁愁見米鹽惟醉倒忽傳騷客賦寒
梅感物傷春同懊惱江邊不識朔風勁牆頭亦有南
枝早未開素質夜先明半落清香春更好鄰家小婦
學閑媚靚粧惟有長眉掃孤芳已與飛霰競結子仍
先百花老苦遭橫笛亂飛英不見遊人醉芳草可憐

物性空自知羞作繁華助芒屨

復次前韻答潛師

憐君古木依巖槁西江飲盡須彌倒
野花幽草亦何爲嶮韻高篇空自惱
萬點浮溪輒長歎一枝過嶺仍誇早
拾香不忍遊塵汗嚼藥更憐真味好
道人遇物心有得瓦竹相敲緣自掃
誰知真妄了不妨令我至今思璉老
妙明精覺昔未識但向閑窻看詩草
浮雲時起鳥四飛畢竟安能亂清昊

景福順老夜坐道古人搐鼻語

中年聞道覺前非邂逅仍逢老順師
搐鼻徑參真面目掉頭不受別鉗鎚
枯藤破衲公何事白酒青鹽我是誰
慚愧東軒殘月上一盃甘露滑如飴

畫枕屏

繩床竹簟曲屏風野水遙山霧雨濛長有灘頭釣魚
叟伴人閑臥寂寥中

次韻王適留別

遠謫勞君兩度行復將文字試平衡干時豈爲斗升
祿聞道應忘寵辱驚未了新書誰與讀重留佳句不
勝情決科事畢知君喜俗學消磨意自清

次韻子瞻特來高安相別先寄遲适遠卻寄
邁迨過遜

老兄騎驢日百里據鞍作詩若翻水忽吟春草思惠
連因之亦夢添丁子羣兒競長堪一笑老馬臥餐何
日起聞兄盡室皆舊人見面未曾惟遜耳遲年最長
二十六已能幹父窮愁裏豫兒揚眉稍剛勁黨子温
純無愠喜我兄憔悴我亦窮門戶久長真待爾但令

戢戢見頭角，甑倒囊空定。何恥家藏萬卷須，盡讀此外一簪無。所恃船中未用廢詩書，閉窗莫看江山美。

次韻子瞻端午日與遲适遠三子出遊

人生逾四十，朝日已過午。一違少壯樂，日迫老病苦。丹心變爲灰，白髮粲可數。惟當理鋤耰，教子執耒黍。誰令觸網羅，展轉在荆楚。平生手足親，但作十日語。朝游隔提攜，夜臥困烝煮。未歌唐棣詩，已治芻靈祖。士生際風雲，富貴若騎虎。奈何貧賤中，所欲空齟齬。

次韻子瞻留別三首

公來十日坐東軒，手自披雲出朝日。山川滿目竟何有，波浪翻天同一濕。諸門迭出驚異狀，間道懷歸終舊壁。此行千里隔江河，何人更問維摩疾。

野人性似修行僧，長願幽居近林麓。南遷無計脫簪

組西歸誰爲栽松竹頭上白雲卽飛蓋耳畔清泉當
鳴玉洛川猶是冠蓋林更願高飛逐黃鵠

東西南北無住身羯末封胡四男子彫鏤不遣治章
句爛漫先令飽文字疎慵嗟我厲之人生子夜中唯
恐似傳家粗足不願餘同駕柴車還我里

次韻子瞻行至奉新見寄

四年候公書長視飛鴻背十日留公談欲作白蓮會

筠州無可與者往還惟一僧耳

匏瓜一遭繁賣酒長不在夜歸步

江濤明月照清瀨心開忽自得語異竟非背音一樽
談笑間萬事寂寥外欲同千里行奈此一官礙何年
真耦耕舉世無此大

贈醫僧鑒清二絕

肘後醫方老更精鬚眉白盡氣彌清只應救病能無

病豈是平生學養生
門人久作開堂老
庭檜看成合抱圍
它日浴堂歸洗背
回頭還解放光輝

贈醫僧善正

老怯江邊瘴癘鄉
城東時喜到公房
歷言五藏如經眼
欲去三彭自有方
身厭遠遊安靜術
因多病更深長
時爲我談尊宿
曾入南公古道場

食菱

野沼漲清泉
烏菱不直錢
蟹肥螯正滿
石破髓初堅
節物秋風早
樽壘夜月偏
令人思淮上
小舫藕如椽
留滯高安四年有
餘忽得信聞當
除官真楊間偶成
小詩書于屋壁

數間茅屋久蹉跎
四見秋風入薜蘿
北棹偶然追鴈

羽南公誰復伴漁蓑三年賈傅驚吾老九歲劉郎愧
爾多此去仍家江海上不妨一葉弄清波

洪休上人少年讀書以多病出家居泐潭爲
馬祖脩塔以三絕句來謁答一首

早除郎將少年狂祖塔結緣歸故鄉習氣未消餘業
在逢人依舊琢詩章

勉子瞻失幹子二首

人生本無有衆幻妄聚耳手足非吾親何況妻與子
偶來似可樂強作室家喜忽去未免悲欣成要矜毀
君家兩歲兒畢竟何自始變化違初心涕泗劇翻水
吾儕近始悟造物聊復試道力竟未完聰明信難恃

又

破甑不復顧彼無愛甑心棄璧負赤子始驗愛子深

誠知均非我胡爲有不能一從三界遊久被百物侵
朝與喜怒交莫與寵辱臨四物皆不勝生死獨未曾
不經大火燒孰爲真黃金棄置父子恩長住旃檀林
偶遊大愚見餘杭明雅照師舊識子瞻能言
西湖舊遊將行賦詩送之

五年賣鹽酒勝事不復知城東古道場蕭瑟寒松姿
出遊誠偶爾相逢亦不期西軒吳越僧弛擔未多時
言住西湖中巖谷涵清漪却背閭井喧曲盡水石奇
昔年蘇夫子杖屨無不之三百六十寺處處題清詩
麋鹿盡相識况乃比丘師辯淨二老人精明吐琉璃
笑言每忘去蒲褐相依隨門人几杖立往往聞談詞
風雲一解散變化何不爲辯入三昧火卯塔長松欹
淨老不復出麈尾清風施蘇公得罪去布衣拂霜鬢

空存壁間字鬱屈蟠蛟螭知我卽兄弟微官此棲遲
問何久自苦五斗寧免飢俯首笑不答且爾聊敖嬉
我兄次公狂我復長康癡反復自爲計定知山中宜
但欲畢昏娶每爲故人疑君歸漫洒掃野鶴非長羈

將移績溪令

坐看酒壚今五年恩移巖邑稍西還宅年貧富隨天
與何日身心聽我閑山栗似豢應自飽蜂糖如土不
須慳仲卿意向桐鄉好身後烝嘗亦此間

約洞山文老夜話

山中十月定多寒纔過開爐便出山堂衆久參緣自
熟郡人迎請怪忙還問公勝法須時見要我清談有
夜闌今夕客房應不睡欲隨明月到林間

將之績溪夢中賦泊舟野步

扁舟逢野岸試出步崇岡山轉得幽谷人家餘夕陽
被畦多綠茹堆屋剩黃梁深羨安居樂誰令志四方

謝洞山石臺遠來訪別

竄逐深山無友朋往還但有兩三僧共遊渤澥無邊
處扶出須彌最上層未盡俗緣終引去稍諳真際自
虛澄坐令顛老時奔走竊比韓公愧未能

贈方子明道人

水銀成銀利十倍丹砂爲金世無對此人斬術不肯
傳闔戶泥墻畏天戒今子何爲與我言人生貧富寧
非天鉗鎚橐籥枉心力鑿鹽布被隨因緣我來江西
晚聞道一言契我心所好廓然正若大虛空平生伎
倆都除掃子言舊事淨慈師未斷有爲非淨慈此術
要將救飢耳人人有命何憂飢

回寄聖壽聰老

五年依止白蓮社，百度追尋丈室遊。
睡待磨茶長展轉，病蒙煎藥久遲留。
贊公夜宿詩仍作，巽老堂成記許求。
回首萬緣俱一夢，故應此物未沉浮。

乘小舟出筠江二首

短舫漂浮真似葉，小篷低淺僅如巢。
幽吟但覺山川走困睡，不知風雨交紅飯。
白醪供醉飽青蓑，黃籜可纏包一竿。
鶴髮它年事萬斛，龍驤任見嘲。

宦遊欲學林間鵲，每到新年旋疊巢。
篷籜籠船聊似屋，漁樵把臂便成交。
不妨袖裏攜詩卷，尚可床頭置藥包。
古史欲成身愈困，客來未免答譏嘲。

寄題孔氏顏樂亭

顏巷久已空，顏井固不遷。
荆榛翳蔓草，中有百尺泉。

誰復飲此水裹飯耕廢田有賢孔氏孫芟夷發清源
廢床見縷刻古甃昏苔痕引瓶注瓢樽千歲忽復然
嗟哉古君子至此良獨難口腹不擇味四體不擇安
遇物一皆可孰爲我憂患阮生未忘酒嵇生未忘鍛
欲忘富貴樂託物僅自完無託中自得嗟哉彼誠賢

徐孺亭

徐君鬱鬱澗底松陳君落落堂上棟澗深松茂不遭
伐堂毀棟折傷其躬二人出處勢不合譬如日月行
西東胡爲賓主兩相好一榻挂壁吹清風人生遇合
何必同一朝利盡更相攻先號後笑不須怪外物未
可凝心胸比干諫死微子去自古不辨汗與隆我來
故國空歎息城東舊宅生茅蓬平湖十頃照清廟獨
畫徐子遺陳公二人皆合配社稷胡不相對祠堂中

滕王閣

客從筠溪來，欵仄困一葉。忽逢章貢餘，滉蕩天水接。
風霜出州渚，草木見毫末。勢奔西山浮，聲動古城業。
樓觀却相倚，山川互開闔。心驚魚龍會，目送鳧鴈滅。
遙瞻客帆久，更悟江流闊。使君東魯儒，府有徐孺榻。
高談對賓旅，確論精到骨。餘思屬湖山，登臨寄遺堞。
驕王應笑滕，狂客亦憐勃。萬錢罄一飯，千金賣豐碣。
豪風相凌蕩，俳語終倉猝。歐陽文忠公嘗云王勃記
文似俳而唐人貴之如此
也何事往空長，江人來逐飛。楫短篇竟蕪，陋絕景費彈。

壓但當倒罌瓶，一醉付江月。

次韻道潛南康見寄

一葉追隨魚與龍，紅粳白酒幸年豐。也知山色遙相
待，苦畏君詩欲見攻。乘興風帆終日去，尋幽蠟屐及

春同請君先入開先寺待濯清溪看玉虹

珍做宋版印

車浮

并敘

結木如巢承之以簣沉之水中以浮識其處方舟
載兩輪挽而出之漁人謂之車浮此詩所謂汕也
與遲适同作車浮詩

寒魚得汕便爲家兩兩方舟載小車謀食旋遭芳餌
誤求安仍值積薪遮情存未免人先得欲盡要令物
莫加身似虛舟任千里世間何處有寧置

題都昌清隱禪院

北風江上落潮痕恨不乘舟便到門樓觀飛翔山斷
際松筠陰翳水來源升堂猿鳥晨窺坐乞食帆檣莫
遶村誰道谿巖許深處一番行草認元昆

長老惟混
曾識子瞻

兄於淨因
有簡刻石

送章戶掾赴澧州

江船不厭窄，船窄始宜行。
風裏長先過，灘頭一倍輕。
迎親無惡處，祿養勝躬耕。
澧上春蘭早，猶堪弔屈生。

除夜泊彭蠡湖遇大風雪

莫發鄴陽市，曉榜彭蠡口。
微風吹人衣，霧繞廬山首。
舟人釋篙笑，此是風伯候。
杙舟未及深，飛沙忽狂走。
晴空轉車轂，淥水起岡阜。
衆帆落高張，斷纜已不救。
我舟舊如山，此日亦何有。
老心畏波瀾，歸臥塞牕牖。
土囊一已發，萬竅無不奏。
初疑丘山裂，復恐蛟蜃鬪。
鼓鍾相轟戾，戈甲互磨叩。
雲霓黑旗展，林木萬弩發。
曳柴眩人心，振旅擁軍後。
或爲羈雌吟，或作倉兕吼。
衆音雜呼吸，異出殊圈臼。
中霄變凝冽，飛霰集粉糅。
簫騷蓬響乾，晃蕩牕光透。
堅凝忽成積，澎湃殊未究。

紵縞鋪前洲瓊瑰琢遙岫山川莽同色高下齊一覆
淵深竄魚鼈野曠絕鳴雉孤舟四鄰斷餘食數升糗
寒蠶僅盈盎腊肉不滿豆敝裘擁衾眠微火拾薪構
可憐道路窮坐使妻子詬幽奇雖云極岑寂頃未覲
一年行將除茲歲真浪受朝來陰雲剝林表紅日漏
風稜恬已收江練平不縐兩槳舞夷猶連峯吐奇秀
同行賀安穩所識問癯瘦驚餘空自憐夢覺定真否
春陽著城邑屋瓦凍初溜艱難當有償爛熳醉醇酎
正日夜夢李士寧過我談說神怪久之草草
爲具仍以一小詩贈之

先生惠然肯見客旋買雞豚旋烹炙人間飲食未須
嫌歸去蓬壺却無喫

舟中風雪五絕

北風吹雪密還稀
雪勢漸多風力微
孤棹獨依銀世
界山川路絕欲安歸

曉風吹浪作銀山
夜雪爭妍布玉田
風力漸衰波更
惡通宵撼我正安眠

擁纜埋篷不見船
船窗一點莫燈然
幽人永夜歌黃
竹賴有丹砂煖寸田

濁醪麤飯不成歡
白浪飛花雪作團
窻外時來一雙
鴨浮沉笑我不禁寒

江面澄清雪未融
扁舟蕩漾水無蹤
篙師不用匆匆
去遍看廬山羣玉峯

題南康太守宅五老亭

五老高閑不入城
開軒肯就使君迎
坐中莫著閑賓
客物外新成六弟兄
雲氣飄浮衣袂舉
泉流灑落佩

環聲岌然終日俱無語靜壽相看意自明

書廬山劉顛宮苑屋壁三絕

山西舊將本書生歸老巖間未厭兵臥聞布水中宵
起錯認邊風萬馬聲
雕弓掛壁恥言勳出入樵漁便作羣五馬親來看射
虎不愁醉尉惱將軍
肩輿已棄躡風騅舊物仍存楊柳枝一曲清歌尤近
好五陵故態未全衰

再遊廬山三首

當年五月訪廬山山翠溪聲寢食間藤杖復隨春色
到寒泉頓與客心閑巖頭懸布煎茶足峽口驚雷泛
葉慳待得前村新雨遍扁舟應逐好風還
憶自栖賢夜入城道邊蘭若一僧迎偶然不到終遺

恨特地來遊慰昔情海外聲聞安至此堂中天鼓爲
誰鳴匆匆復向深山去一盞醍醐飽粟甕

羅漢院有新羅羅漢

堂中法鼓特大

此山巖谷不知重赤眼浮圖自一峯芒躋隨僧踐黃
葉曉光消雪墮長松石泉試飲先師錫午飯歸尋下
寺鐘勝處轉多渾恐忘出山惟見白雲濃

汲陽阻風

鍾陵距池陽相望千里內江神欺我貧屢作風雨礙
欲投皖公宿三日逢一噫孤篷面空山朝食淡無菜
白醪幸餘瀝黃卷漫相對飢吟非吾病疾走老所戒
焦先近不遠蝸舍聞尚在區區問養生借我一帆快

張嘉祐

道人何爲者陽狂時放言寶塔昔所構鐵券今尚存

此張所言其漫浪難究悉孰知彼根源草庵劣容膝
餘都不可曉俯仰拳肩跟無食輒行乞一飽常閉門爾來二十年
未嘗變寒温嗟哉豈徒然此意未易言偶來一笑喜
但恐笑我昏

效韋蘇州調嘯詞二首

漁父漁父水上微風細雨青簑黃篛裳衣紅酒白魚
莫歸莫歸莫歸歸莫長笛一聲何處

歸鴈歸鴈飲啄江南南岸將飛却下盤桓塞北春來
苦寒苦寒苦寒寒苦藻苻欲生且住

至池州贈陳鼎秀才

淮陽學舍舊相依常誦曹溪第一機却到江西心有
悟回看過去年事皆非孤舟遠適身如寄二頃躬耕道
自肥欲看齊山君去否閑中徒侶近來稀

次韻遲初入宣河

遠客安長道低篷稱小溪雲添濕帆雨舟滯沒蒿泥
草綠耕牛健村深候鳥啼陶翁方作令歸去未成題
次韻侯宣州利建招致政汪大夫
社甕壺漿接四鄰肩輿拄杖試紅塵慣眠林下三竿
日來看城中萬井春世上升沉無限事樽前強健不
貲身經過已足知公政長見車中有老人

次韻侯宣城疊嶂樓雙溪閣長篇

作官如負擔一負當且弛不知息肩處妄問道遠邇
我乘章江流却入宛溪水捨舟陟崔嵬行路極句已
名都便欲過佳處賴公指仰攀疊嶂高俯閱雙溪美
不悟身乘空但覺風吹耳雲煙變遙壑歌吹聞近市
倦遊得清曠行役有新喜公言頃榛穢斬伐從我始

堰水種蒲蓮開山蒔梅李擁本待成陰養花要食子
遺風揖桓謝父老邀黃綺邦人魚依蒲食客莪在泚
春陰迫寒食謂我姑且止嗟余去鄉國屢把刀環視
感公鵠鷺脩憐我鳧鴨庠異邦逢故人寧復固辭理
高談雲漢上爛醉笙歌裏落日盡公歡推挽未應起
初到績溪眎事三日出城南謁二祠遊石照偶
成四小詩呈諸同官

王一首謁梓潼廟二首謁汪
王廟二首四首游石照

行年五十治丘民初學催科愧廟神無限青山不容
隱却看黃卷自憐貧雨餘嶺上雲披絮石淺溪頭水
蹙鱗指點縣城如手大門前五柳正搖春

石門南出衆山巔沃壤清溪自一川老令舊諳田事
樂春耕正及雨晴天可憐鞭撻終無補早向叢祠乞
有年歸告仇梅省文字麥苗含穗欲蠶眠

行盡清溪到碧峯陰崖翠壁畫杉松故留石照邀行
客上徹青山最後重

雨開石照正新磨鳥度猿攀野老過忽見塵容應笑
我年來底事白鬚多

縣中諸花多交代江君所栽牡丹已過芍藥
方盛偶寄小詩

偶來山邑便成家慚愧潘生滿縣花想見清樽檻邊
飲尚留佳句壁閒誇根株未老年年好艷色方穠日
日加聞道北遊無意味春深河上足風沙

楊主簿日本扇

扇從日本來風非日本風風非扇中出問風本何從
風亦不自知當復問大空空若是風穴旣自與物同
同物豈空性是物非風宗但執日本扇風來自無窮

次韻答人幽蘭

幽花耿耿意羞春，紉佩何人香滿身。
一寸芳心須自保，長松百尺有爲薪。

次韻江法曹山間小酌

高情不奈簿書圍，行揖青山肯見隨。
綠野逢花將盡日，清樽迨我正閑時。
簷閒雙鷺欲生子，葉底新梅初滿枝。
笑殺華陽窮縣令，床頭酒盡只嚙眉。

官舍小池有鸚鵡遺二小雛二首

半畝清池藻荇香，一雙鸚鵡競悠揚。
來從碧澗巢安在，飛過重城毋自將。
野鳥似非官舍物，宰君昔是釣魚郎。
直言愧比奇章老，得縣無心更激昂。

清池定誰主，鸚鵡自來馴。
知我無傷意，憐渠解託身。
橋陰棲息穩，島外往來頻。
勿食遊魚子，從交長細鱗。

次韻答人見寄

對案青山雲氣騰天將隙地養無能
牕扉迎暑梅將溜虛市無人冷欲冰
寂默忘言慚社鷺
毯毳困睡比春鷹
深知大府容衰病
復值年來蠶麥登

次韻答魏孝仙檻竹

猗猗元自直落落不須扶
密節風吹展清陰
月共鋪叢長傲霜雪
根瘦恥泥塗
更種愁無地
應須翦碧蘆

欒城集卷第十三